


# Funafréttir



Rósa Steinunn Hreinsdóttir  
Halldórsstöðum  
601 Akureyri

1. Tölublað. 5. Árgangur. Janúar 2000.

## Frá stjórn Funa.

Nú liður senn að aðalfundi Funa og því eru nokkur atriði sem við viljum minna á. Fyrst er að telja skil á starfsskýrslum nefnda. Þær þurfa að hafa borist til Önnu Kristínar eigi síðar en 14. febrúar næstkomandi. Þeir sem hafa aðgang að tölvu geta sent skýrslurnar í tölvupósti. Netfangið er annakristin@islandia.is. Hinir verða að notast við einhverjar aðrar aðferðir.

Svo eru það blessuð árgjöldin, enn eiga um 25 aðilar eftir að greiða árgjöldin í Funa fyrir árið 1999. Þessir aðilar hafa enn nokkra daga til að gera skil, það er fram að næstu mánaðarmótum. Annars neyðumst við til þess að strika þá út af félagaskrá eins og lög félagsins kveða á um. Er það einlæg von okkar að til þess þurfi ekki að koma.

Aðalfundur Funa verður haldinn á Melgerðismelum föstudaginn 25. febrúar kl. 20.30. Dagskrá fundarins verður eftirfarandi:

- a) Skýrsla stjórnar.
- b) Afgreiðsla reikninga.
- c) Starfsskýrslur nefnda.
- d) Lagabreytingar.
- e) Gerð starfsáætlun.
- f) Tekin ákvörðun um árgjald.
- g) Kosningar.
- h) Önnur mál.

Vonumst við til þess að sem flestir sjái sér fært að mæta og taka þátt í umræðum um framtíð félagsins. Það er alltaf gott að heyra skoðanir hins almenna félagsmanns sem sér hlutina kannski frá öðru sjónarhorni en við sem störfum í stjórn félagsins hverju sinni. Það er ekki síður mikilvægt fyrir þær sakir að nú hafa hestamannafélögin á Norðurlandi hafið viðræður um samstarf á ýmsum sviðum hestamenskunnar. Eins og margir vita nú þegar, þá hefur verið ákveðið að Íslandsmótið í hestaiþróttum verði haldið á Melgerðismelum síðustu helgina í júlí og munu Eyfirðingar, Skagfirðingar og Húnavetningar standa saman að því móti.

Þá hafa formenn og varaformenn Funa, Léttis, Hrings og Þráins einnig borið saman bækur sínar með nánara samstarf í huga. Það er engin spurning að aukið samstarf hefur marga kosti í för með sér og því ber að skoða það með opnum huga.

Að lokum óskum við ykkur velfarnaðar á nýbyrjuðu ári, bæði í starfi og leik.

Stjórn Funa.

~~~~~

### Létt grín.

Læknir, ég er hingað kominn út af meðalínu sem þú lést mig fá um daginn.

Þessu sem átti að stæla mig og styrkja.

Og hvað með það?

Jú sjáðu til. Ég næ bara alls ekki lokinu af meðalaglasinu.

Hvernig gekk megrunarkúrin hjá konunni þinni, Emil?  
Æðislega vel. Í síðustu viku hvarf hún alveg.

## Bæjakeppni Funa 1999.

Bæjakeppni félagsins var haldin á Melgerðismelum laugardaginn 21. ágúst í ágætisveðri. Alls tóku 80 aðilar þátt í keppninni að þessu sinni og eru þeim færðar bestu þakkir fyrir stuðninginn. Þessir aðilar eru:

|                        |                      |                             |
|------------------------|----------------------|-----------------------------|
| Króksstaðir-Stefán     | Þórustaðir V.        | Brekka                      |
| Svertingsstaðir II.    | Svertingsstaðir III. | Skálpagerði                 |
| Ytri-Hóll I.           | Berjaklöpp           | Hjarðarhagi                 |
| Syðri-Hóll-Þuriður     | Garðsá-Orri          | Höskuldsstaðir              |
| Jóðisarstaðir-Snæbjörn | Garður II.           | Staðarhóll                  |
| Öngulstaðir-Baldur     | Öngulstaðir-Birgir   | Öngulstaðir-Sigurgeir       |
| Bjarg-Ragnar           | Björk                | Tjarnagerði                 |
| Syðri-Tjarnir          | Hóll II.             | Komma-Vilberg               |
| Punktur                | Brúnalaug II.        | Klauf                       |
| Uppsafir-Jóhann        | Uppsafir-Ingi        | Félagsbúið Rifkelsstöðum I. |
| Litli-Hamar            | Kambur               | Stóri-Hamar-Jónas           |
| Bringa-Jóna og Sverrir | Bringa-Freyja-Reynir | Kvistás                     |
| Akur                   | Fellshlíð-Svanborg   | Kálfagerði-Sigrún           |
| Möðruvellir-Anna       | Hríshóll-Erna        | Hríshóll II                 |
| Stekkjarflatir         | Gnúpufell-Ingibjörg  | Hrísar-Hulda                |
| Arnarstaðir            | Hólakot              | Vatnsendi                   |
| Villingadalur          | Torfufell            | Torfufell II-Hallgrímur     |
| Halldórsstaðir         | Hólsgarði            | Jórunnarstaðir              |
| Ártún                  | Samkomugerði II.     | Árgerði                     |
| Stóri-Dalur            | Hvassafell           | Litli-Garður                |
| Mikligarður            | Ysta-Garði           | Árbakki                     |
| Gilsbakki              | Holtset              | Torfur                      |
| Grund I                | Grund II.            | Dvergsstaðir                |
| Víðigerði              | Espihóll             | Merkigil                    |
| Hranastaðir            | Hrafnagil            | Kristnes                    |
| Reykhús                | Teigur-Herdís-Birgir | Teigur-Þorgerður-Stefán     |
| Hvammur                | Hólshús-Hólmgeir     |                             |

Keppt var í fimm flokkum og voru keppendur alls 65 talsins.

Úrslit voru eftirfarandi:

### Barnaflokkur: (16 keppendur)

1. Þorgils Magnússon á Sóma 8 vetra brúnstjörnöttum - keppti fyrir Litla-Garð.
2. Anna Sonja Ágústadóttir á Blökk 9 vetra brúnni - keppti fyrir Árbakka.
3. Svana Ingólfadóttir á Jökultopp 10 vetra leirljós,blesóttum - keppti fyrir Freyju og Reyni á Bringu.

### Unglingaflokkur: (7 keppendur)

1. Ásdís Sigursteinsdóttir á Fleyg 9 vetra rauðblesóttum - keppti fyrir Stóra-Dal.
2. Silja Valdimarsdóttir á Gjóstu 6 vetra brúnstjörnöttri - keppti fyrir Fellshlíð.
3. Ragnhildur Reynisdóttir á Forki 10 vetra jörpum - keppti fyrir Hólshús- Hólmgeir





## Frá ritstjóranum.

Nú er svo komið að ég er orðin uppiskroppa með efni í þetta blessaða blað og það er ekki í fyrsta skipti. Til þess að stækka blaðið aðeins þá verð ég að grípa til ritstuldar sem er nú sjálfsagt í lagi ef þið látið það ekki fara lengra. Viðfangsefnið verða hestavísur af ýmsum toga og vona ég að einhverjir hafi gaman af. Þeir sem eru lítið fyrir vísur ættu hinsvegar að hætta lestrinum hér með.

### Stökur.

Folinn nettur fer á skrið,  
fylginn spretti gapinn.  
Ef hann slettist útá hlið  
ofan dettur knapinn.

Með sopagutl og söngva kvak  
samferðahópurinn reið.  
Annað hvort aftur á bak,  
ellegar nokkuð á leið.

Skrykkjótt reið og taumatog  
til þess líkum bendir  
að sumir fullir séu og  
sumir talsvert kenndir.

Drekk ég mikið dýrðlegt vín,  
dreg úr hiki vífsins.  
Eru svikul athvörf mín  
yst á skikum lífsins.

Ég hef stundum hesti hleypt  
hálfur eða meira.  
Gegnum lífið stömpum steypit,  
stuðlað grín og fleira.

### Blakkur.

Töltir mjúkur grjót og grund,  
gnejstafjúkið drífur.  
Teygist búkur, tryllist lund,  
taum úr lúkum þrífur.

Gripur sprettinn sprækur klár,  
spila klettur undir.  
Stæltur, léttur fleygist frá,  
fjöll sem sléttar grundir.

Fótalipur hendist hann,  
honum fípar ekki.  
Þvílík grip ei fyrr ég fann  
né fjörtök svipuð þekki.

### Karlaraup.

Oft af litlu glaðst ég gat,  
gæðing tók til kosta.  
Vín á pyttlu mikils mat,  
meyjum jók ég losta.

Syngjandi ég söðla hest,  
sá mun teljast vakur.  
Aðstæðunum uni best  
ofurlítið rakur.

Ég hef mörgum hesti hleypt,  
hampað ljóðapenna.  
Oft á veigum dýrum dreypt,  
dugað vel til kvenna.

Afkoman er ekkert grín,  
efnahagur þröngur,  
enda höfða helst til mín  
hestar, vín og söngur.

Á vegferð minni virðist fátt  
um veraldlegan gróða,  
þó ég hafi oftast átt  
úrvalshesta góða.

Af ævi minnar sögu sést  
sé að dáðum hugað,  
að fætur mínir fyrst og best  
til flóttans hafa dugað.



### Smellin vísa.

Situr brellið fola flón  
fremur hnellin skvísa.  
Þiljur svella þekja Frón.  
Þetta er smellin vísa.



### Vonbrigði.

Ætíð skaltu iðka streð,  
eðlið kalt ég nefni.  
Þér er allt svo þvert um geð,  
þú ert saltkjöts efni.

## Vísukorn.

Að vera á hestum vinum með  
veitir mesta gleði.  
Lögg í nestið léttir geð,  
löngum flest þá skeði.



Hringaði makkann, teygði taum,  
talinn blakka prýði.  
Reiðar frakkan gerði glaum,  
grjótið sprakk og flýði.



Gráni veginn fljótt um fer,  
finnst hann eigi slakur.  
Yngismey á baki ber  
blakkur fleygivakur.



Litli-Skjóni leikur sér,  
lipurt hefur fótatak.  
Pabbi góður gaf hann mér,  
gaman væri að skreppa á bak.



Er hún Fífa undir mér  
eins og drífi tundur.  
Hennar stífu hófarnir  
holtin rífa sundur.



Skeiðar, brokkar, tifar, töltir,  
teygir snoppu í himnarann.  
Uppi á baki einn þar bröltir,  
allvel sá til verka kann.



Á þó detti dimmleit skúr,  
digni þéttu hárin,  
læt ég spretta spori úr,  
Sporð, minn létta klárinn.



Handleggur, sem hastur var,  
hrekkiabólginn líka,  
hann er orðinn einskonar  
afturbatapíka.



Gerir lítið gagnlegt starf,  
grálynd vísnaðra.  
Vegaskítur vakning þarf,  
vanur að bíta aðra.



Viljabann mun þjaka þann,  
þver er hann og töfull.  
Rangstökk kann, því illu ann  
- allra manna djöfull.

Meðan endist ævin mín  
eg skal vera glaður.  
Elska hesta, víf og vín  
og vera drykkjumaður.



Hesturinn minn heitir Brúnn,  
hann er ekki falur  
þó bjóðist annar beislahúnn  
og bandaríkisdalur.



Glymur undir grjót og mold,  
í gömlum jarðarskrokki.  
Bráðólmir þá bruna um fold  
beykirinn og Sokki.



Heims af kvölum hef ég nóg,  
harma bitur ljárinn.  
Margt eitt bölið bætir þó  
blessaður hvíti klárinn.



Þó haglið dynji hart á kinn  
og halli skömmum degi,  
kviði ég ei því klárinn minn  
kennir alla vegi.



Allt er breytt sem áður fyrr  
okkur veitti gaman,  
kváðu sveittir karlarnir  
og klárum beittu saman.



Farðu vel með folann minn,  
fæstum reyndist þægur.  
Hann er eins og heimurinn,  
hrekkióttur og slægur.



Ekki verður illskan blönk.  
Út til ferða leystur  
er hann gerður upp í hönk.  
að aftanverðu reistur.



Botninn sárum búinn er,  
berjast klár og skrokkur.  
Pikkar ári undir mér,  
illur fjárans brokkur.



Ljárskógs-Grána lengi mun  
lélegt og fátt til vina.  
Sleikir hann út um af ilöngun  
eftir að bíta hina.